



#### 48 Pelajar Tingkatan Empat Sertai KEMPAS



*Kumpulan pelajar dari (SMK) Agama Melor, Kota Bharu bangga dengan pencapaian pertama mereka.*

**PUCHONG, 5 Jun** - Seramai 48 pelajar tingkatan empat seluruh negara menamatkan Kem Pendidikan Alam Semula Jadi (Kempas) 2009 di Hutan Simpan Ayer Hitam, Puchong, di sini baru-baru ini.

Majlis penutup program anjuran Fakulti Perhutanan Universiti Putra Malaysia (UPM) menerusi tajaan ExxonMobil Exploration and Production Malaysia dengan kerjasama Berita Harian serta Kementerian Pelajaran itu menyaksikan peserta dari Sekolah Menengah Kebangsaan (SMK) Agama Melor, Kota Bharu muncul kumpulan terbaik.

Masing-masing membawa pulang wang tunai RM 1,000, Sijil Simpanan Pendidikan Nasional (SSPN) RM 250 setiap seorang, sijil penyertaan dan hadiah iringan yang disampaikan Timbalan Naib Canselor (Penyelidikan dan Inovasi) Prof. Dr. Abu Bakar Salleh.

Majlis dihadiri oleh Pengurus Hal Ehwal Awam Subsidiari Exxonmobil Malaysia, Farid Jaafar dan Dekan Fakulti Perhutanan, Prof. Madya Dr Awang Noor Abd Ghani serta Penolong Pengarah Bahagian Sukan, Seni dan Kokurikulum, Raja Azlan Raja Sulaiman.

Tempat kedua dimenangi SM Sains Selangor yang memperolehi wang tunai RM800 dan SSPN RM200 setiap seorang, manakala tempat ketiga SMK Putrajaya, Presint 9 (1) dengan membawa pulang RM600 serta SSPN150 setiap seorang.

Peserta yang mewakili setiap negeri disertai tiga individu dengan seorang guru pengiring sebagai pelengkap program enam hari bermula 1 Jun lalu.

Kempas bermula dengan kuiz sains semula jadi sekolah menengah sejak 32 tahun lalu telah mendapat sambutan menggalakkan dan kemudian dibuat melalui aktiviti luar bilik darjah menerusi aktiviti perkhemahan.

Prof. Dr. Abu Bakar berkata pada peringkat awal pertandingan seramai 3,811 peserta dari seluruh negara mengambil bahagian dengan saringan awal program diadakan dalam bentuk ujian bertulis yang bertujuan memilih pasukan layak menyertai peringkat kebangsaan.



*Timbalan Naib Canselor (Penyelidikan dan Inovasi), Prof. Dr. Abu Bakar Salleh (dua dari kanan) menyampai hadiah kepada guru dari (SMK) Agama Melor sambil diiringi Dekan Fakulti Perhutanan, Dr. Awang Nor Abd. Ghani (kanan).*

Disediakan oleh Seksyen Media dan Publisiti, Bahagian Komunikasi Korporat UPM.